

Gij Cienzgangj Gamjyahmui

□ Cinz Gvanghniui/覃光扭 Lungz Limeiz/龙利梅

Vujsenh Yen Dungzlingj Cin Mbanjsaihingh baihlaeng miz goengq bya ndeu, heuhguh Byayahmui, gwnz Byayahmui miz aen conghgamj ndeu, heuhguh Gamjyahmui. Aen gamj neix gvangq lumj aen lij dangz, geij bak vunz naengh youq ndawde hix mbouj ndaet. Baihlaeng Byayahmui, lumj duz mui ndeu cingq naengh youq gwnz daenggeij ciuq gingq dajcang.

Dingqgangj, Gamjyahmui miz aen goj geizheih ndeu.

Cienznaeuz, gaxgonq, Sanhdungh miz boux daegmbauq he heuhguh Cinz Cunghdai, youz daengz Mbanjsaihingh, bungz raen duz manaez hung dungx iek ndeu, de baez raen Cinz Cunghdai, sikhaek coemj hwnjbae. Cinz Cunghdai nyex gyauej couh buet. Seiz de buet daengz bakgamj, couh deng duzmanaez hung gyaep dawz lo, manaez hung haeb dawz aen hoz de, gamz de haeuj ndaw gamj bae.

Hoeng, Cinz Cunghdai mbouj-caengz ngaiz gwn bae. Caemhcai, haet laeng de lij guh aen fangzhwnzloq ndeu, de loq raen bonjfaenh bienqbaenz boux lwnghing ndeu, cingq ninz youq ndaw rungj daxmeh, ndoet gwn gij raemxciy daxmeh diemz haenx. Miz raq rumz ndeu ci gvaqdaej, de daengx ndang saenzdedded, singj lo. De cengq da yawj seiz, “ya…… ya…… ya……” daih hemq hwnjdaej.

Yienzlaiz, de fatyienh swheij cingq ninz youq ndaw rungj duzmui, cingq ndoet gwn gij cij de, duzmui aiq miz haj bak gaen, song fwngz got dwk de, lumj daxmeh ndiep lwg nei hawj daeglwg de gueng cij. Duzmui ndaem

raen de ndiu lo, riunyumnyum cuengq de roengz le, yienzhaeuh buen ngauq rinloet ndeu daej, saek dai aen bak-gamj.

Aen dou deuzmingh deng saek, Cinz Cunghdai sim naeuz: “Dai lo, ngamq deuz ok bak manaez, seizneix youh baenz gij gwn ndei duzmui hung lo.

Hoeng, de engq doeksaet dwg, duzmui mboujdan mbouj gwn de, lij daj baihlaeng rag ok duzmanaez dem, Cinz Cunghdai baez yawj couh rox, duz mabag neix dwg duz ngoenzlwenz yaek gwn de haenx. Mboujgvaq, mbouj rox vihmaz, de caeux couh ngaiz moeb dai lo. De cingq doeksaet dwk bak aj lumj cih “o” hung ndeu, duz muimeh ndaem sik roengz song diuz ga, diuz ndeu ndenq hawj de, lingh diuz cix bonjfaenh gwn hwnjdaej.

Hoeng, Cinz Cunghdai mbouj gamj gwn, diuz ga manaez lwedraengraeng, singsoepsoep, de gwn mbouj roengz. Caiqlj, de siengj, mui ndaem gwn liux manaez couh gwn bonjfaenh lo, baenzlawz lij miz simcingz gwn doxgaiq dem.

Mehmui dangyienz mbouj rox Cinz Cunghdai siengj gijmaz, de gwn diuz ga manaez sat le, cim Cinz Cunghdai boux daengx ndang saenzdedded neix yawj hauilai nanz, lumjnaeuz siengj gangj gijmaz cix itcig gangj mbouj okdaej.

Banhaemh, mehmui youh sik le song diuz ga manaez, lumj gyanghaet nei, diuz ndeu ndenq hawj Cinz Cunghdai, diuz ndeu de lienz bwn daiq lwed gwn roengz dungx bae.

Cinz Cunghdai siengj mbouj gwn,

hoeng aen dungx de cix heuh hwnjdaej. Mwhneix, de hix yawj okdaej lo, duz muimeh ndaem camhseiz lij mbouj siengj gwn de, “lauheiq, de siengj ciengx biz le caiq gwn, lauheiq, de siengj caj bouxhek daej le caiq caez gwn. Mboujguen de, gou dienz dungx imq gonq caiq gangj.” Cinz Cunghdai yienghneix siengj, de soucomz gij fwngz ndaw gamj, mbon rin okdaej, diemj dawz feiz le, dawz song diuz ga manaez neix gauj cug le, diuz ndeu ndenq hawj duzmui, diuz ndeu gag gwn.

Mehmui ndaem coengzlaiz mboujcaengz gwn gvaq gij noh manaez baenzneix rang, ndigah, gwn imq le de couh caeuj Cinz Cunghdai yiyei yaya

doxgangj. Daj ndaw vah duzmui, Cinz Cunghdai roxnyinh, aen gamj neix couh dwg rongz mui meh ndaem. Ngoenzlwenz de dauqma seiz, manaez hung cingq youq ndaw congh yaek gwn Cinz Cunghdai. Duzmui ndaem dangyienz mbouj hawj duzmanaez ciemq aen congh de, de sikhaek cung hwnjbae caeuj manaez doxhoenx, ginggvaq buekmingh haenqrem, duzmanaez deng de moeb dai lo. Hoeng mwhneix, Cinz Cunghdai gaenq mbouj miz heiq lo, mbouj miz banhfap, duzmui cijndei oet bakcij haeuj ndaw bak de bae. Cinz Cunghdai ndoet gij cij de le cij dauqconglix gvaqdaej.

Mehmui ndaem gangj sat, couh aeu got Cinz Cunghdai ninz. (1)



▲ Lajmbanj Lozcwngz gizgiz heusausau vanzging gig ndei.
Liu Gvanghfuz ingi.

Lauxdoengz

□ Moz Lijginz / 磨礼勤

Vanz Gencingh naeuz: “Couh ciuq moix bingzfueng cibbet maenz hawj gou, dwg moix bau cibseiq maenz, mwngz couh aeu gij dan bouxgai caenfwngz sij haenx caeuj soujgih doiqciuq, aen soq ngoenzlawz seizlawz cungj geiq ndaej cingcuj caez.”

Cinz lauxbanj naeuz: “Seizbienh mwngz lo.”

Vanz Gencingh naeuz: “Vunzai gangjvah it couh it, ngeih couh ngeih, gofaex dwg gofaex, go-nywj dwg go-nywj gaej dawz go-nywj bienq baenz gofaex.”

Laujuj sikhaek naeuz: “Ngoenz-

lwenz gou bae lajmbanj raen ranz ndeu ndaem miz hauilai faex humx gvaq ranz seiqhenz bae, ranz baihnaj miz benq dieghoengq ndeu gyaundeih lumj sei lumj veh.”

Vanz Gencingh naeuz: “Lajmbanj faex henranz couh lai lo, mwngz lai bae geij baez, go’nganx, golaeh, gorungz hung gvaq ndang vaiz, cien bi, geij bak bi cungj miz.”

Laujuj naeuz: “Gou bae ranz haenx miz di daegbied, laj gofaex baij miz hauilai diuz giemxdourin ciuhgeq, geij cib bi gvaqbae, ngoenzlwenz gou dauqcong

yawjraen, singjsien raixcaix.”

Vanz Gencingh naemj, mbanj gyawz bouxlawz caeuj de ityiengh doiq giemxdourin ciuhgeq miz yinxdaez? De cam: “Mwngz daengz mbanj gizlawz raen giemxdourin?” Laujuj naeuz: “Gou mbouj rox coh mbanj, dwg gou hai ci soengq song dah lwgnyez caeuj daxmeh cawx saw haenx bae daengz bakdou ranz.”

Cawx saw? Vanz Gencingh naemj daengz dahhung de caeuj dahlgw Laujuj heuh vunz lai gien cienz cawx saw, de cam: “Song dah lwgnyez heuh gijmaz mingzcoh?”

Laujuj naeuz: “Dah ndeu heuh…… heuh Vanz gijmaz lo.” “Vanz Meijyen.” Vanz Gencingh naeuz. “Dwg lo dwg lo.” Laujuj naeuz, de cam Vanz Gencingh: “Mwngz baenzlawz rox dwg Vanz Meijyen?” Vanz Gencingh naeuz: “Vanz Meijyen couhdwg dahlgw gou lo.”

Laujuj doeksaet dwk dinghaem cimyawj Vanz Gencingh, Cinz lauxbanj hix roxnyinh daengz miz di geizheih, naeuz: “Dinglingz ndaej lumj denyingj nei.” Vanz Gencingh gamjdoengh dwk naeuz: “Docih mwngz ho Uj ginghlij, haemhneix gou cingj sou gwn haeux.” Cinz lauxbanj naeuz: “Bae, bae, gou cingj, gyawz miz bouxguhong cingj lauxbanj gwn haeux.”

(33)

